

洞霄圖志

中

伏



洞霄圖志卷第五

本山隱士鄧牧 牧心編

本山道士孟竇 集虛集

人物門

昆山之石不皆美玉而美玉自是而生麗水之沙不皆精金而精金從此而得求駿良馱者必之冀野求豫章楠梓者必之晉山誰謂紺髮方瞳鶴骨松貌之士而不由名山出哉昔者廣成子高臥於崆峒庚桑楚尸居於畏壘三茅上征於句曲兩錢輕舉於武

夷夫豈獨其人之卓異如此亦山川之靈發之故我
郭許二真君鍊質窮谷飛神曾霄後世有志者聞而
慕之結荆誅茅成道而去者未易悉數耳目所接不
過千百之什一爾其有被褐懷玉自同凡夫湮沒不
傳者蓋多也對泉石而遐想凌煙霞而浩歌我輩亦
若人爾豈不與之精神皎皎相往來於六合之外哉
敘人物第五

列仙

晉

靈曜郭真君

郭文字文舉河內軹人年十三歷華陰山石室中得石函卽神虎內真紫元丹章也後晉室亂乃入餘杭大滌山伐木倚林苦覆爲舍不置四壁時猛獸害人先生獨居十餘年無害鹿裘葛巾區種菽麥或採箬以貿鹽酪有餘卽施貧人一日有虎張口向之先生視其口有橫骨乃引手探去明旦虎置一鹿舍外適有獵人來宿因指與之後虎服役如僕從令負箬隨行常置於鳳凰山側先生貨藥歸晚虎嗥今名其地

皞亭時餘杭令顧公颺與葛洪共造其舍攜與俱歸
贈以韋袴褶一具不受手植三松與虎游息樹下王
導聞其名遣人迎之不馭舟車荷檐徒行導置之西
園朝士咸往觀焉頽然箕踞傷若無人溫嶠問曰人
皆有六親相容先生棄之何樂曰遠行學道不謂遭
世亂欲歸無路爾又曰飢思食壯思室自然之理先
生獨無情乎曰情由憶生不憶故無情又問先生獨
處窮山死爲烏鳶所食柰何曰埋藏者食於螻蟻復
何異又問猛獸害人先生獨不畏耶曰人無害獸心

則獸亦不害人又問世不寧則身少安先生不出濟
世乎曰非野人之所能知也後復逃歸吳地記載先
生嘗坎木書之上曰金雄記下曰金雌記蓋讖晉祚
也餘杭圖經云檢先生區種處尙在坎木處有泉亦
稍湮塞梁乾化三年七月封靈曜真君今臨安沖虛
宮武康郭林餘杭天真仙洞亦各有遺迹

贊曰典午雲擾之人入山苦覆一室豈云求安箕
踞西園在朝聚觀尙役猛虎何畏達官葛翁忘言
溫生慙顏千古大滌山空月寒

歸一許真君

許邁字叔元一名暎後改名元字遠游七世祖肇後漢安帝時爲光祿勳永初中大饑人相食肇救活四百八人永建元年拜司徒子訓孫相竝爲三公至神仙者八人先生與旌陽令遜護軍長史穆皆再從兄弟早與王右軍父子周旋及楊羲和真人結神明之交永和二年入臨安西山登岩茹芝渺然自得有終焉之志卽今大滌也常謂餘杭山是洞庭西門潛通五嶽與右軍書曰自山陰至臨安多有金堂玉室仙

人芝草左元放之徒漢末諸得道者在焉後於山中
師王世隆著詩十二首論神仙事初以書棄妻卽孫
驃騎之女妻有書荅之載丹臺錄中其後妻亦入山
得道先生四十八於大滌中峯丹成天降玉童白鹿
下迎而去垂語弟子云吾有丹一劑藏山中無骨箬
下異日有緣者得之梁乾化三年封歸一真君今有
昇天壇在中峯宋政和閒猶有卿雲簫吹往來
贊曰陰德有後篤生真才結神明交葆毓聖胎十
載天壇功圓道賅不有帝鄉吾何歸哉白鹿無迹

江寧府志卷五
金丹久埋隱隱簫吹卿雲往來

唐

潘先生

先生不知何許人亦不詳其名字徧游山川愛天柱
止焉自郭許二君仙去泉石荒蕪元封古壇亦且湮
沒先生慨然發憤請諸朝唐高宗夙聞其名爲敕創
天柱觀仍以四維之中壁封千步禁斷樵採爲長生
之林錢武肅碑略載其事蓋漢武建壇後歷年雖久
不過名山而已至先生乃建爲宮觀傳道至今非所

謂真師者哉後於曹橋福業觀成道事見雲笈
贊曰元封建壇不可復稽晉人遺跡煙草離離先
生得道志尋幽栖一旦金碧照映山溪名林長生
樵採莫窺登覽長慨神游何之

葉天師

葉法善字道元栝蒼人三世爲道士身長九尺能厭
劾百鬼卜居本州卯酉山有巨石橫道行者紆逕避
之遂投以神符石自起高宗召入問道時睿宗明皇
紀年廟號已先知之先天中拜鴻臚卿員外置封越

國公舍景龍觀僚庶受籙者不可勝數開元中與明
皇於中秋夜共游月宮還過潞州取玉笛請上奏一
曲仍投金錢城中越旬日潞州奏中秋夜有天樂臨
城兼獲金錢以進年一百有七歲後羽化葬于松陽
百官編素送之初天師得道來游天柱適錢塘江有
巨蜃溺舟經涉者苦之青山鎮長沈愈來迎於是往
焉時潮信未至投丹篆江際戮之以鐵簡鎮於江心
遂絕其患至今舟楫無虞皆受賜天師也已而回山
平居二十餘載嘗役鬼神建講堂觀門外聽法者雲

集有仙花靈鶴之祥載古跡門

贊曰神道設教受知明皇入覲顧問出從翱翔高
高月宮不見漁陽人謀何及天數適當夜半鬼工
山中講堂遺跡已化茲人不亡

吳天師

吳筠字貞節華陰人祖元舉孝廉父元亨峽州刺史
先生通經誼美文詞舉進士不中性高介不能與時
俯仰天寶初召至京師明皇與語甚悅自請隸道士
乃入嵩山依潘師正究其術與李白於高天師壇參

受上清畢法初所與帝言皆名教世務帝嘗問道對曰深於道者無如老子五千文復問神仙治鍊對曰此野人事積歲月求之非人主宜畱意求還嵩山及復過江而漁陽兵起識者以爲知幾後居餘杭天柱山精思有感行教於江漢其文章與李白相上下凡四百五十卷禮部侍郎權德輿集爲序大歷十三年於宣城道觀焚香尸解弟子邵翼元奉喪歸葬于天柱山西麓私謚宗元先生初天師嘗語其徒云我死當遷神於天柱石室蓋太上俾我鍊蛻之處故從之

女冠王真一亦先生弟子纔十餘歲卽絕粒誦黃庭
經天寶閒於天柱山得道今先生有天柱觀碣雷山
中

贊曰貞節深悟道德五千漁陽騁兵知幾超先飛
鳥南渡煙塵漲天勞我華陰息我于宜巖巖石室
書劍藏焉與誰同調錦袍謫仙

司馬天師

司馬承禎字子微號白雲子河內溫人也晉宣帝弟
太常燾之後唐襄州刺史仁寂之子居天台山事體

元潘先生傳辟穀導引術無不通後與陳子昂盧藏
用宋之間王維孟浩然王適畢構李白賀知章爲方
外十友睿宗召之延問其術對曰爲道日損損之又
損以至於無爲夫心目所知見每損之尙不能已況
攻乎異端而增知慮哉帝曰治身則爾治國柰何對
曰國猶身也故游心於淡合氣於漠順物自然而無
私焉而天下治矣帝嗟嘆久之乞還山賜寶琴霞帔
公卿賦詩送之常侍徐彥博總而爲序曰白雲記盧
藏用早隱終南山後登朝見先生將還指終南曰此

中大有佳處何必天台對曰以僕觀之仕宦之捷徑
爾藏用有慙色明皇召入內殿問以道多祕不傳女
真謝自然汎海欲詣蓬萊求師至一山見道士謂曰
天台司馬承禎名在丹臺身居赤城真良師也自然
遂還求之得度冲舉一旦謂弟子曰吾於玉霄峯東
望蓬萊常有真仙降駕今爲青童君所召須往矣俄
頃蛻去詔贈銀青光祿大夫諡正一先生帝親爲製
碑韋渠牟作傳文集行於世初天師常往來天柱山
故錢氏碑曰被褐幽人據梧高士挹澄泉之味息青

江寧圖志卷五
蘿之陰葉天師法善朱法師君緒吳天師筠暨天師
齊物司馬天師承禎夏侯天師子雲皆棲神物表繼
踵雲根出爲帝王之師歸作神仙之侶

贊曰晉室神胄寄身赤城霞帔辭顯丹臺著名播
以聲詩有唐公卿東望蓬萊列仙降迎女真氏謝
聞道服膺一日乘雲渺焉上征

夏侯天師

夏侯子雲不詳其字從峨眉山來年二十狀貌甚古
投司馬天師門下夙興夜寐勤侍巾盥凡十數年未

嘗一日怠缺與物無競不屑世務其師愛之如子及
師羽化乃於大滌山中築藥圃種芝朮之屬常言古
聖人以上藥養神中藥養性下藥遣病可使人神靈
可使人性明可使人病愈有藥圃詩云綠葉紅英遍
仙經自討論偶移岩畔菊耨斷白雲根好作詩輒棄
其橐故罕有傳者或縱神游目熙熙自得歸院則掩
戶經日寂無所聞有鄰院道士窺見一草衣人同坐
亦瞑目不語至暮啓關伺之則無所見天復中乘異
獸歸隱東峯不知所在

贊曰司馬之門入室者希峨眉山人狀貌魁奇頰
甲紺芽黃精紫芝采采餘閑臨流詠詩異獸可馭
東峯何之千古莫識誰爲草衣

朱法師

朱君緒字法滿餘杭縣人年十八入道居玉清觀閉
戶下帷終日燕坐而已後以玉清地迫喧囂不可久
處乃拂衣入天柱山數年道成一日微疾倏起命水
澡浴具冠褐焚香端坐暨齊物朱韜光等知當羽化
跪泣而辭師曰吾於彭殤存亡齊之久矣悲忻願戀

何有於其閒哉然道妙寂寂感者通焉神理冥冥契者昭焉吾言之矣汝知之矣言訖而逝時開元八年五月二十九日也

贊曰道妙寂寂神理冥冥心曉所悟下帷玉清晚入天柱積年道成談笑觀化身如羽輕奚悲殤子奚羨老彭萬古一電誰爲死生

暨天師

暨齊物字子虛師玉清觀朱法師君緒受法錄神符祕方救物不怠後隨入太滌山精思院勅垂象樓三

閒又名書樓積書數千卷其上日以著述爲事每講
貫元學聽者歎服錢氏賜度弟子對曰樂靜久矣不
願有之王曰師必鬼神侍衛凡徒何爲哉所居室壁
東西各置一竅採煉日月光華每語人云吾非久往
羅浮石樓矣一旦不知所之

贊曰精思古院強學不息書樓插天萬卷委積罷
書何爲飲月漱日面腴玉華腹果金液神游八表
不假羽翼羅浮石樓一往無迹

閻上元同先生

閩上方遠字大方舒州人生州之天柱山下二十九
歲師香林左元澤旣得道已乃徧尋名山至餘杭天
柱異而止焉蓋餘杭與舒州咸有天柱山傳記所載
天有八柱者也錢武肅王師事之號元同先生唐景
福二年爲築上清壇榜草堂每三元開授法籙乾寧
二年與先生相度地理改觀基爲甲向營建一新表
奏其道業於朝昭宗累詔不起乃就加命服賜號妙
有大師光化三年親製觀記稱先生朝修虔懇科戒
精嚴實紫府之表儀乃清都之輔弼加以降神之地

卽舒州之天柱山也身生天柱之前往脩天柱之下
察其符契信不徒然蓋撫薦章語天復二年二月十
四日沐浴焚香端坐返真顏色不變有異香三日方
散是夜武肅王夢先生騎鶴訪別明日訃至及就壙
但空棺而已後有人見於廬阜自言我捨大滌歸隱
瀟山天柱源也先是太平青領書自漢于真人傳授
卷帙浩繁複文隱祕先生鈔爲二十卷文約旨博學
者便之弟子夏隱言等十人受思真鍊神之旨今道
院僅十八齋而派出先生者十有四焉

贊曰降神古舒得道餘杭兩柱擎天千里相望殊
庭翼翼命服煌煌鶴背永訣狸首空藏先生曷歸
匡廬阻長厥有神孫百世彌昌

鄭冲素先生

鄭元章字博文幼號神童十五歲辭親學道依真系
大師李歸李特爲建星壇授上清畢法精修不倦景
福二年與元同先生同居天柱山精思院武肅王因
命入開元宮啓建壇籙門下受度弟子一百三十餘
人王表奏朝廷云啓建日有彩雲臨壇仙鶴五百餘

常先生

常中行錢塘人師河南馮德之形貌奇偉落魄不拘
檢好飲酒及音律篋無畱金所有一簫一笛而已常
曰陰符經有強兵戰勝之道非外事也亂吾真者不
能入卽戰勝爾多往來餘杭浣坎得錢悉市酒有趙
道人啖瓦礫如餅餌先生一見愛之引入臥內對飲
達旦每醉則袒肩曰皮如鐵肉如石皆從脩養得治
平四年六月語弟子沈日益曰吾不久居此偃臥俄
頃起曰嗟乎吾未能出卽於几案閒設鑑一水盂一

時時取視之神色怡然越三日而逝葬天柱峯下明年正月往杭州見故人胡達夫值不在畱刺而去胡他日聞先生解化亟求其刺已失所在是歲遠日或芟墻草見兩竅僅啓驚請衆觀之探以杖空空如也歲餘其徒有解后於茅山者

贊曰忘情杯觴寄興音律強兵戰勝厥有奇術隱几懸解對鏡神出馬鬣無恙鶴形已失逢人句曲不異平日何年吹簫重過石室

喻沖和先生

喻天時字齊仲號蟾華子自幼隸業洞霄政和閒以
詩科試中選精天文歷數識緯醫藥之學至驅雷召
雨旋著靈異宣和閒敕住信陽軍神霄萬壽宮朝廷
屢遣使降香祈禱有感賜號沖和先生淳熙三年以
故之徽州太守沈君禮遇之一日別太守云上天名
我朝廷亦名我且赴上天名也第去之日疾雷大雨
毋恐居旬日信然太守具其狀上聞而朝廷果欲召
之且遣使矣先是嘗語其徒曰我死歸雷部爲仙君
治世閒不平事是時以雷雨爲驗其徒奉喪歸藏於

大滌山棲真洞側

贊曰齊仲博學聞名政和黃冠入試以詩擢科坐
檄雷雨不煩撓呵中使函香屢至岩阿宣室耿耿
玉樓峩峩回顧下土不平謂何

陸石室先生

陸維之字永仲一名凝字子才餘杭人少以計偕入
汴道遇異人謂曰秀才難望科第不如還山贈以丹
一粒且戒俟緩急用之及下第歸舟循汴河風激浪
怒且將覆追憶前語以丹投之風浪始息河上有呼

其姓名者則所遇異人也自是有超世之志隱于大
滌山之石室人因以石室稱之消搖林谷詩酒自娛
嘗觀潮錢塘有醅江月詞云遠山一帶遡晴空極目
天涯浮白楓落鴉翻談笑處不覺雲濤橫席酒病方
蘇睡魔猶帶一掃無畱迹吳帆越棹恍然飛上空碧
長記草賦梁園凌雲筆勢倒三江秋色對此驚心空
悵望老作紅塵閑客別浦煙平小樓人散回首千波
寂西風歸路爲君重噴霜笛高宗嘉賞欲召見辭疾
不赴及上退處北宮嘗幸大滌憲聖亦偕行上問山

中詩客或以維之對進其行卷上讀數首太息曰布衣入翰林可也欲歸與孝宗言之憲聖曰山林隱士必不求名強之出山乃大勞苦遂止未幾以疾卒太博關注子東贈先生詞序云吾鄉陸永仲博學高才自其少時有聲場屋今棲白鹿洞下絕葷酒屏世事自放塵埃之外行將六十而有嬰兒之色非得道者能如是乎乃作水調歌頭一闕詞云鳳舞龍蟠處玉室與金堂平生想望真境依約在何方誰信許君丹竈便與吳君遺劍只在洞天傍若要安心地須是遠

名場幾年來開林麓建山房安眠飽飯清坐無事可
思量洗盡人閒憂患看盡仙家風月和氣滿清揚一
笑塵埃外雲水遠相忘先生嘗進百論有石室小隱
集三卷臨終了然書一詩云岳南之館白雲端鳳笛
龍簫徹廣寒一鶴曉飛沖碧落羣仙笑倚玉闌干
贊曰永仲逍遙觴詠自娛年過八十髮青顏朱金
丹弗餌玉堂弗居空負石室平生著書鳳笛龍簫
洋洋騰虛笑領羣仙薄游帝都

王元素先生

王朴字元素其先北京大名府人避地轉徙至臨安
愛金岫山川之勝因家焉初蜀之青城有方士五結
侶東南游至浙右中一人忽曰吾塵緣猶未斷更當
爲人子三紀捐衆別去莫知所之先生父球以積善
聞鄉里室潘氏孕及月一夕夢偉丈夫衣冠甚古跨
白鹿入門驚寤而生先生方在襁褓口吻常咿嚶若
有所誦人以葷茹啖之輒搖手作麾去狀旣長丰神
峻整未嘗學詩而觸景吟詠不凡及冠苦不願娶父
母訶責不得已受命婚之夕婦至乃從閒道出走家

人徧索得之野外力挽以歸既得子而婦喪長嘯曰
吾責已塞況有三弟可與父母訣矣遂棄家結茅大
滌山石室與隱士陸永仲鄰居講求脩真鍊養之術
有閒則更倡迭和見者咸謂興寄飄飄真不食煙火
語後歸省親其舍旁有嶺一綫之蹊臨懸崖千仞往
來苦之先生贊其父闢爲夷塗翼以闌楯以便行者
訖工乃歸未幾沐浴趺坐而化年果三十六永仲遣
報其家翌日父母俱來忽舉首開目微哂復瞑陸君
讚其像曰彭氏之壽顏氏之夭誰得誰失春花秋草

山雲卷舒水月昏曉本自不動彈指中了瘞於石室
之麓有一白鹿呦呦循行冢上忽不見其徒以其字
私謚元素先生

贊曰青城故人長揖別去積善之家夢已驚寤旣
償宿因復遠所怙結交石室究竟龍虎三十六年
如旦斯暮呦呦白鹿空繞獨墓

楊先生

楊迺誠字叔閑潼川人爲州之定光觀道士東游襄
漢荆吳久而息大滌山中形貌頽業顏如渥丹目光

射人帶索苴布寒暑如一飲酒至斗不醉或終日坐
林中無知者名聞當時高宗居德壽宮名見與語甚
悅慈福太后問道要以師事之爲築室於宮之通明
館側又建菴西湖延祥觀以便往來棲息有旨促召
則麻鞋入見淳熙初力乞西歸越三載旨遣使往唁
方見其坐蛻旋具奏內脩黃籙追嚴之命高士何守
澄進青章有云仙凡相遠罔知脩短之期道俗雖殊
固有師資之禮

贊曰山林高蹈不釣聲名爲帝者師亦何足榮斗

酒一布浩歌徒行鶴歸大滌蟬蛻通明斷夢西湖
飛神南冥青章追慕九重至情

陳寢虛先生

陳君良孫南渠人童年得道隱居杭吳山修煉丹成
獨喜天柱每與幽人韻士往來其間常離地三尺懸
虛而臥因號寢虛先生窮冬積雪浴溪澗中略無寒
色自餘靈異不可殫紀有紫極觀過天柱山詩云道
在吾身宇宙寬朝踰雲岫暮雲關丹靈不服春風轉
欲度世人那得閑

贊曰列子御風先生寢虛風尙有託虛獨安居至
人行世匪血肉軀其中不有外焉取餘人以爲幻
我以為如紛紛談仙勿誑迷愚

朱妙行先生

朱真靜字復常杭臨安人自幼好學丹經元文一覽
輒通其意每春自攜籃入山摘茶有客至掌擎爲供
不事茶具真率可想見嘗意行經宿忘返諸徒方驚
憂忽歸云吾游大滌洞遇道人碧巾黃衣相攜至馴
虎巖下坐語移時而已不謂經宿也題壁間曰經書

那得語虛無荆棘林中有坦塗不遇異人真口訣誤
人錯下死工夫一日整冠裳謝同衣遂登石室宴坐
垂二十載名聞于朝遣中使召不起初先生入山猛
獸巨蛇屢至左右舉手麾之悉遜去有病者扣門求
救噓氣按摩無弗愈者淳祐癸卯夏語諸徒曰吾卜
中元別此山矣及期書偈曰去來如一真性湛然風
收雲散月在青天跌坐而化膚瑩眼碧不異生時理
宗聞之哀悼賜宸翰特贈妙行先生

贊曰丹經萬卷讀者茫昧復常一閱意領神會抱

元石室二十餘載猛虎伏藏巨蛇引退揮偈脫穎
跌坐委蛻青天湛然素月常在

國朝

周崇道先生

周允和字謙甫號清溪杭仁和人初生有雷殷
殷發地下鄰里驚異十八歲入大滌師冲妙先
生性淳謹奉師長不憚細務交游無親疎極力
周急作詩無塵俗氣游江湖間遇可師者輒請
傳性命學瞑目宴坐或終日宋淳熙初宣醮內
庭賜號妙有大師七年開山冲天觀未幾遷太
一宮觀妙齋高士與褚雪巘郭似山爲方外友

丙子春避地山谷閒鄉鄰相率衛之曰勿怛吾
善人今至元戊寅授崇道沖應清真大師洞霄
主席壬午三月兼領太一宮秋九月復還九鎖
乙酉七月初夢游大滌洞天見數仙人吟詠一
指示云蒼然聳空碧指點人不識我來契宿緣
鐫記雲根石二十五日沐浴正衣冠召徒衆環
集云疇昔之夜夢游有頌仙人示吾歸期記日
錄昨暮見星大如月西墜今往矣歷歷敘別已
端坐而化神色不變自朱妙行尸解後再於先

生見之壽六十六

贊曰謙甫蚤年問道江湖夫豈無得瞑目燕
居夢游洞天宿緣旣符明日殞星盍歸來乎
妙行仙去追踪者疏不有若人則吾道孤

阮鶴巖先生

阮日益號鶴巖杭於潛人受度於里之天目元
雷山真慶觀鶴形古貌苦志食淡徧游湖海通
性命學讀書展卷悟解註道德南華二經自成
一家早歲兀坐于天目石巖中至寒暑不動其

鄉星渚趙侍郎尤所敬愛爲築菴所居觀後坐
靜四十年大滌住山菊巖龔先生亦爲築菴石
室延請居之有泉州陳道士志同脩煉遠來相
依一時學者咸嚮風焉旣久復還故山自是不
出今至元年閒尸解仙去壽八十餘

贊曰峩峩天目挺生仙才清虛早悟聲利俱
灰趙公星渚築菴招徠垂四十載宴坐巖隈
老莊註就讀者心開何年石室跨鶴重來

續編

葉高行先生

葉林字儒藻一字去文號本山錢塘人讀書博
探古雅詩文多有正體特立獨清性無苟合布
衣飄然故人畱之輒止止亦不久餽之輒不受
往來甚輕片楮亦不能攜歲丙戌游天目至九
鎖山沈高士介石招致所營冲天觀小室介溪
山間日一食二十年如一日或強飲亦不拒至
醉飽兼人間亦不食三數旬唯啖果蔬顏色自
若遇積雪登巖谷四顧月下獨步林影閒深夜
忘返每芳時良夜遇物觸景必見之吟詠至成

長短句辭意宛曲如真有情經久亦能記誦之
無傳橐四方慕者洎名公達官排闥請見對客
箕踞自若寄傲或欲薦之

朝聞其清議而止時里人鄧牧亦隱大滌白鹿山
房與林深相得山中爲作行窩其閒每月夜必
往其處相與劇談甚適弗往牧則詣焉李坦之
亦錢塘人年僅二十餘深究詩家法度與二公
爲師友嘗遺詩云空山歲暮寒氣集霜葉塞徑
人跡沒風吹古礪水生鱗雪落枯林木摧骨葉

公凍餓山之阿衣弊不補牽雲蘿冰霜骨奪烈士氣梅花一榻春風多東峯鄧公公畏友一節同高良不偶閉門兀坐鍊精魄松根爲糧蜜爲酒山中郭許不復還天壇石室蒼苔斑千年之後公等出名山之名當未畢歲乙巳冬葉公元兀危坐幾兩閱月所親張氏家臨平有兄子依焉僧復文嘗築室待公偕隱遣書報行期旣皆來明日書偈案上泊然而化大德丙午正月八日也壽五十九瘞書劒冲天觀西步竹塢有遺

橐傳山中衆稱曰高行先生

贊曰去文得道宴坐沖天一食單衣垂二十
年晚交鄧李相忘不言自適其適非佛非仙
白鹿山房行窩儼然高名千古與茲山傳

鄧文行先生

鄧牧字牧心家世錢塘自號三教外人年十餘
歲讀莊列悟文法下筆追古作者及壯視名利
薄之徧游方外歷覽名山逢寓止輒杜門危坐
晝夜唯一食歲丙申至越山陰脩竹王公延致

陶山書院己亥還錢塘入餘杭洞霄止焉身不
衣帛服楮禦寒嘗遇異人受倚鍊法至是於宮
之超然館入室宴坐或數月不出四方名勝不
憚遠塗以文字請每一篇出爭傳誦之非其人
求之厚餽弗爲其自重如此住山介石沈公爲
營白鹿山房石室顛居之最深處扁曰空屋公
自作記命工鑿石奇甚左右植梅竹與五巨松
相閒每云山居占勝不啻足矣時里人葉林亦
隱九鎖冲天觀有行窩山房中與公爲深交忽

一日謂同道曰吾二人不久他往似有言別意
大德丙午正月八日葉公坐蛻公誌其墓踰半
月亦無疾而化信然瘞劒履石室洞下壽六十
嚴陵胡汲古別爲作傳有洞霄志游山志雜文
彙傳山中衆稱曰文行先生

贊曰石室之顛山名白鹿歲久荒蕪寒煙古
木爲公結構扁曰空屋潤色吾教表章林谷
玉樓有名金丹已熟若此仙才誰其可續

茲山自晉逮今千百年閒得道仙去者衆矣綿歷歲月無復可稽僅得二十二人而已然又有作者雖未敢遽儕列仙其或事業可稱文章可傳亦不敢泯沒別爲高道傳云

高道

唐

白威儀先生

白元鑿不詳其字西川成都府人高祖君敏武德功臣父洪演高蹈不襲封娶申屠氏生一子卽先生也

元宗幸蜀時爲威儀道士住上皇觀志在絕俗逍遙
遐舉周覽山川訪前賢高蹈之躅得餘杭天柱觀止
焉四十年矣元和十二載八月解化瘞于天柱山大
滌洞東北嘗有山中十詠

贊曰有志絕俗白公威儀自蜀來南名山棲遲元
酒味淡大音聲希積四十年無人見知山中遺老
傳誦十詩適興而已不矜能之

宋

馮先生

馮德之字幾道河南人少習儒業書無不讀京師號馮萬卷不慕聲利棄家入道被旨住杭州洞霄宮時公卿皆以詩餞行宋眞宗銳意元教盡以祕閣道書出降餘杭郡俾知郡戚綸漕使陳堯佐選先生及冲素大師朱益謙等脩校成藏以進號雲笈七籤初詩人潘閻與先生爲道義交任泗州參軍卒先生囊其骨歸葬天柱山錢易銘潘墓具載其事

贊曰幾道一諾生死不負相與逍遙道交有故不遠千里歸骨天柱宮牆西偏突兀潘墓幾年雲笈

滄海圖志卷五
脩善校誤學仙志士讀者元悟

唐先生

唐君名子霞未詳其字宋政和閒入道洞霄宮性嗜
讀書尤長著述謂大滌洞天歷千五六百年其閒幽
人勝士高行危言不得有傳于世私切痛之乃著書
名大滌洞天真境錄其自序曰大哉五嶽爲天下之
鎮自餘山川籍其名者洞天福地爾蓋真仙所宅靈
氣自生昭然若雲從龍風從虎使其居者神清性悟
而虛無有歸實元風之可鄉也杭州餘杭縣西十

八里有天柱山宮曰洞霄者自漢武帝志崇道學立
爲真靖之場脩生高士靡不栖遲于此宮有五洞交
扃九峯迴挹千崖萬谷秀聚其中泉飛彤廈之簷雲
鎖碧壇之角祥光雲涌嘉木返於春枝撫掌泉靈神
丹藏於翠箬誠姑射之令壤歟由是磬流方外恨不
能泠然御風引千里於頃刻爾蓋雖朝士大夫駿馭
之游亦未得探其異迹於戲勝槩千百年來終乏采
錄無以發其蘊奧又安得目擊而足履之哉僕非其
人濫居林下或聞一水一石欣然規往銘在心目今

既得矣匪敢自私遂覈成卷帙雖不足進之作者庶
爲尋幽之一鑑爾時政和王辰十一月望日序後遠
游莫知所終

贊曰大滌名山歷載二千問其故實荒草斷煙先
生發憤搜討成編後來遺逸藉茲有傳孰爲富貴
孰爲神仙自古文章如日行天

石正素先生

石自方字元矩饒州番陽人師沖寂大師孔守容爲
道士長七尺餘厖眉秀髯大耳高顴音聲如鐘莊靜

淡泊有深沈之思經史百氏無不通尤嗜莊列書眉
山陸惟忠授丹訣往來西山廬阜與方外隱逸以琴
酒自適嘗自號渾淪道人時

虛靖天師作菴於龍虎戲珠峯先生至卽下榻榜曰
渾淪菴 虛靖被召拉先生偕行居無何返故廬朝

廷方求巖穴奇士部使者以先生聞強起至京師徽
宗幸寶籙宮講所先生在焉上望見儀狀魁偉名前
問從何來對曰草野臣無他技能江東使者以臣應
詔卽日授金壇郎主杭州洞霄蓋宣和元年冬也明

年七月至官四方學道者翕然從之冬十月盜起嚴
徽閒明年正月破臨安縣官吏散走其徒亦治舟請
行先生曰吾被天子命主此宮守死吾職也公等第
去已而賊至先生正色叱之遂遇害門人程用光叩
闈言死事狀上閱其忠賻錢三十萬贈正素大夫制
書云敕故金壇郎石自方頃者盜嘯浙東侵犯鄰壤
而居官任職者往往驚遁爾典司真館秉志不回叱
罵兇徒遂致蹈難賜頒賻賚超進道階非獨勸死節
者之榮而亦爲偷生者之愧時東南死事者財三數

人士大夫以此高之平生有詩文數百篇以先生死節洞霄號石洞霄曲肱先生熊彥詩作石洞霄傳

贊曰舍生取義名教所美山林閒人人不望此宜和東南嘯聚蠡起望風逃遁守土猶爾元矩正色罵賊以死璽書褒嘉永耀青史

葉靈一先生

葉彥球錢塘人崇寧閒受度尋師方外遡長江上荆漢浮沅湘訪天師遺迹南游吳越過閩廣徘徊羅浮以歸遂走京師寓寶籙宮復還洞霄由是銳意教法

飛章走檄禍福之驗聳動當世至安吉之烏鎮鎮南
有地爽塏乃卜居焉以符水爲民禳禱疾無不愈鄉
人敬信冠履雲集經營之初富者出財貧者出力故
宮殿廊廡金碧煥爛賜額曰崇福宮先生兩領洞霄
晚益精勵賜號虛靖靈一大師於蛻龍洞之傍築室
老焉天台虞公似良榜曰歸雲壽八十四無疾而終
贊曰遠行求師足半四方飛章籲天休咎立彰冠
履雜遝金碧焜煌至今殊庭福庇一鄉築室終老
蛟龍洞傍誰榜歸雲虞公似良

何冲靖先生

何士昭餘杭人自幼有脩真志師上清大洞道士胡處邦受度戒行精勤敦學不倦凡慕道者悉歸焉宣政閒被旨典宮事親詣京師奏請蒙賜度牒三百道令本路漕臣應辦工役一新宮宇道侶雲集號爲全盛重和元年十二月五日召其徒告曰吾歸矣弟子環侍至夜半方就榻聞異香盈室亟視已右脇而逝時境內往往聞鐘聲後二日探囊得一紙書頌云五十年住人世靈臺不染纖瑕壬午三更子後天開萬

里無霞蓋是日壬午也賜號冲靖大師

贊曰冲靖居山戶外屨滿乃奉綸書聿新琳館午夜鐘聲回薄天半四筵涕泗九重歎惋錦囊遺頌
去住懸斷彼哉塵人疾病則亂

李明素先生

李洞神字雲友杭之新城人自幼不茹葷酒嗜黃老學七歲入洞霄受度刻意道法戒行嚴潔中年走淮海謁徐神翁密有所得歸屏人事宴坐林下高宗賜號明素俾主寧壽觀未幾乞還山授右街道錄主洞

霄宮孝宮踐位召使拜章旋卽昭格乾道九年正月
晦日草別書遺同道偃然而寂嘉興錢公敘其行業
刊于遺像有云周流六虛去來自若死而不亡先生
有之贊曰去知而愚性含太初視有若無心包太虛
生而神悟密契道樞死而神在起頌遺書
贊曰詖行浮辭坐掩當世而不容僞生死之際明
素遺形如脫敝屣歷歷別書徧告同志兩朝寵遇
一枕夢寐獨與神翁徜徉天地

陳凝和先生

陳希聲字震甫臨安人師凝妙大師金致一以行業
清高際遇高宗授右街鑒義俾主洞霄宮提綱嚴肅
獎拔後進一時學者向風乾道二年三月車駕臨幸
山中扈從登游東西巖洞賜御書度牒號凝和大師
又書度人經賜焉淳熙三年九月談笑而寂壽六十
有九

贊曰昔宋高皇駕幸名山希聲從游東西兩巖從
容談元喜動天顏御書道經照耀人寰鼎湖旣遠
華表不還惟有喬木曾聞珮環

徐栖霞先生

徐沖淵字叔靜姑蘇人自號栖霞子嘗浪迹江湖閒
淳熙中被召居太一宮高士齋已而奉詔典洞霄通
明館久之會孝宗居重華宮召寘佑聖觀凝神齋嘗
奉命和御製秋懷詩二篇詩云東壁星辰爛不收夜
涼河漢截天流芙蓉院靜琴三疊翡翠簾開月一鉤
黃屋非心辭大寶碧雲有意思高秋金聲玉振掩前
作漢祖空懷猛士憂天末虹蜺晚未收龍池新雨漲
清流鷗緣適意頻依渚魚不貪香懶上鈎賸喜三邊

無警報況當萬寶得成秋嘯歌高蹈羲皇上不復深
貽海內憂又令進西游詩表云臣伏以頃歲蒙恩薄
技已塵於淵鑿邇辰奉詔陳言尙簡於帝心深慙瓦
釜之鳴疊溷黃鐘之奏伏念臣知識椎鈍質性棗昏
哦松愧處士之風夢草乏騷人之思綠蓑青筍徜徉
雪水之煙波破帽蹇驢潦倒灞橋之風雪自是結繩
樞之手初非聯石鼎之才敢期誤徹於聽聰遂使叨
承於顧問茲蓋伏遇陛下篤實光輝日新其德聰明
睿知足以有臨學問淵源決汝漢而排淮泗文章鼓

吹動天地而感鬼神創百世之規模冠四始之風雅
以臣么麼逢辰休明雖聖度謙冲博采芻蕘之論而
天威咫尺妄干斧鉞之誅拜手陳詞俯躬待罪臣所
有西游集雜詩類成兩編謹昧死隨表上進以聞上
覽之謂侍臣曰近世士大夫詩有不及者時豫章玉
隆觀主席方虛高士謝守顥薦于郡卽日具禮走京
師迎之居歲餘假化朝奉郎府倅上公琛搜其詩數
百篇刻觀中號經進西游集

贊曰嗟嗟文章與時窮通栖霞以詩顯淳熙中西

游兩編上聞四聰當饋嘉歎有古人風雪案風檠
斧鑿心曾不入里耳永慚秋蟲

俞怡然先生

俞延禧字德厚臨安人受度于洞霄宮自號竹林道人襟韻洒落善丹青高宗賜御衣象簡遷授道秩後以古澗松進孝宗御製詩賜曰犖确奔流瀉玉虹凜然雲幹擬蟠空紅塵車馬稠如織夢入蒼煙萬壑風嘗自寫神恩平郡王見之賜讚曰日角月淵天賜怡然丹青妙筆秉鑑自傳妙中之妙元中之元不知誰

氏子乃玉京之謫仙孝宗又賜以怡然二字俾主寧
壽觀未幾乞還山復俾知洞霄宮隨亦退閑住通明
館翛然棋局閒恬知自養淳熙十四年二月十五日
與道侶對棋拈子稱好著而化高士徐冲淵弔云千
里雲煙三尺畫百年生死一枰棋

贊曰竹林道人蚤歲善畫際遇兩朝馳譽天下蒼
煙萬壑千古無價進非奔競退亦蕭洒晚寄棋枰
坐遣餘暇一子欲落稱賞而化

王純素先生

王思明號竹菴臨安人爲王冲素弟子性嗜書編錄
滿案餘閑寄興風雅與龔冲妙章清隱潘怡雲結山
中吟社當世重之寧宗慶元閒賜純素大師同領宮
事放翁陸公游喜與交爲撰洞霄宮碑謝別放翁詩
云還丹一粒如粟大點鐵成金金不壞服之冲舉騎
蒼龍直上九霄觀世界君藏此藥天下知鬼神正眼
那能窺歸磨蒼石寶君施文章與此元無異真跡尙
在壽七十餘卒有竹菴詩橐棲真洞神光記

贊曰茲山文章遠者莫稽近世具體放翁一碑先

生力請久乃得之觀所與交其人可知手鈔千卷
劫火灰飛有可傳者竹菴集詩

龔沖妙先生

龔大明字若晦仁和人七歲讀書一再過輒成誦其
家與洞霄胡先生志行族相鄰先生省親奇之引歸
度爲弟子弱冠遇異人得脩煉旨神采秀發積三十
餘年升山中主席力辭弗獲強起應緣者四十年自
宴坐外以吟詠自適有南軒藁平淡清逸可觀先是
山中畱題至多久皆散滅至君始哀爲集併刻洞天

眞境錄寧宗聞其名召至禁中齋脩感格及旬歸上
曰卿居洞天與此閒孰勝對曰陛下居天上洞天主
不過人閒洞天爾安可相方然人身自有洞天神明
居之貴賤一理存存於中不爲外邪客氣所據則道
同仙聖足以無愧於洞天之居上稱善賜紫衣賜號
沖妙大師遺金幣甚厚還山建法堂復賜書演教堂
扁理宗朝以國事擾攘遣內臣劉世亨等諭旨欲鑄
鐘以下休咎齋金伍拾兩白金伍伯伍拾兩令合精
銅爲之一鼓而就發音清越詔降內帑設普天醮謝

恩併鐘樓改作由是宮宇一新嘉熙丁酉秋語其徒
曰吾住山緣事畢矣遂掩關不問世事宴坐累月明
年仲春扶杖出山徧詣親舊若告別者歸經夕而逝
容貌如生壽七十有一

贊曰天柱名山騷士必至古詩存者千不一二先
生采錄刻板行世自茲題詠罔有失墜惜哉生晚
不及唐季勿問厥餘斯已奇事

孫靈濟先生

孫處道字元素餘杭人穎異肥皙總角有出塵志嘗

夢幢節迎導入大宮闕主者勞問殷勤若有囑付未
幾隨父入天柱山指樓閣曰此正疇昔夢見者師冲
妙先生嘆曰天意昌吾大滌使爾來耶長通老列莊
書精琴棋嗜丹青序升主席賜號靈濟通真大師歷
二十七年以常產素薄請于朝理宗賜度牒買田陽
羨築塘立圩不數月集事又賜璉川田以益之爲書
洞天福地四字仍賜書清靜經一卷至今冠裳雲集
供給不置皆其力也平日與朱復常談論相契復常
旣得道尸解君以行實奏聞得贈妙行先生景定甲

子彗星見東南每夜起觀容嗟謂左右曰應在今冬
吾不及見矣七月十七日召徒衆戒飭特異常日俄
頃整衣冠端坐而逝年六十有二是歲冬理宗升遐
其言悉驗

贊曰元素蚤年夢游勝地來見洞天宮闕不異惡
知一夢非真造詣二十七年非真夢寐我田旣闕
我庾不匱後人安居毋忽所自

貝徐二先生

貝大欽號懶雲餘杭人入道洞霄住山三十年延納

雲水日親視廚饌無闕典得陳季卿故址建洞晨觀
脩黃錄普度餘萬名自邑至宮十八里道路崎嶇行
者以爲病君捐資買石鑿爲夷塗理宗賜號靈一大
師逮龐眉皓首徜徉泉石閒如神仙中人壽八十六
而終其徒徐應庚亦餘杭人好學日鈔夜誦卒成才
同衣稱徐白眉贊貝君蟄路親董工役不避寒暑增
土築塘架石爲梁夾路樹林木閱五年成亦解化壽
五十餘自景定至今四十餘年行者如在圖畫其師
弟子之功不可沒也

贊曰天柱八邑十有八里道路嶇嶮行者病矣孰
能夷之君師弟子五載成功千古如砥洞晨瓢笠
來者如水後人勉旃勿怠初志

國朝

貝凝真先生

貝守一號月溪餘杭人通經史靈一先生剡洞
晨觀命開山領袖齋道員千人雲會之盛爲苕
邑觀未幾旬閒築居避喧丈室後久之遷九鎖
外山庵吟咏自適有月溪橐鏤板行世畜海上
奇方施藥十餘年不倦自洞晨退席散衣鉢遺
諸徒及親識唯存布衲二念餘年不改操今至
元戊寅序升主席授凝真抱素大師 師劄褒

之曰素懷淡泊尙有典刑推此可見自是終不
事事庚辰九月無疾泊然而化壽八十二

贊曰古人弊縉弗恥爲賢世無令聞文繡爭
妍貝公布衲餘二十年寄興詩酒養高林泉
壽邁八秩報之則天緬懷典刑清風儼然

郎楊二先生

郎如山字魯瞻號一山餘杭人精教典師洞霄

明一先生楊公明一師凌公中年日肯躬侍飲
食澣濯無憚勞苦宋景定閒召居延祥觀賜號

總教大師欲畀道秩辭願榮親上從之官其父
必聞迪功郎會靈濟孫先生被朝命益廣常產
公贊襄爲多今至元丁丑春開山西湖崇真觀
通真齋高士逾年領洞霄主席兼西太一宮共
掌浙西道道教得南塘趙文懿故居建通仙宮
以便雲水先是兵火後民多流亡公設黃籙醮
普度八千餘名多疥蠱之應戊子三月

御史中丞崔公

或

尋訪高道以公入

覲暨乞歸奉

泗水縣志卷五
七日蠲宮門租賦元貞初元

宣命授體元崇教安道法師兼管本山諸宮觀事

丙申

賜宮錦金衣一襲一日謂徒衆曰吾主茲山十九
年名位踰分維持吾教不得然而胸次了無
一物今老矣不久斯世汝等當勉勵進學勿羨
吾榮丁酉十一月初五日無疾而逝壽七十有
三其徒楊公清一字元潔號逸峯臨安人蚤遇
明師精於符法特達好施與鬻餘杭後塘路建

石門通仙橋宋咸淳七年召爲東太一宮法師
九年陞左街鑒義今至元壬午春住持宜興通
眞觀後改陞西太一宮繼郎公席復任家山宮
事丙申秋以郎公命捧香詣

闕郎公之

賜衣公亦與焉已而昇

宣命授沖眞洞元葆光法師歸領杭州路道錄郎
公旣羽化己亥八月涓吉治葬預陳祭告哀慟
而死壽五十七以死傷生固儒者所弗許然與

其易也寧戚今世爲人子者生事死葬苟弗畔
禮尙以爲孝吾道以義相父子恩弗逮焉乃能
爲人子所難能者其師弟子間相與之至爲可
傳也

贊曰上世得道窮居終身諸侯弗友天子弗
臣教門旣立輕重由人感動當世元風乃新
先生父子榮耀山林況乃慈孝名胡可湮

呂金二先生

呂貴實字若虛徽州休寧縣人通儒業慕陸永

仲隱居來游爲道家流以石室自號襟韻灑落
宋度宗召爲開元宮書記則堂家鉉翁知鎮江
檄領紫府觀與天慶聶先生友善今至元丁丑
舉公代之授明一凝虛沖妙大師兼本路道錄
爲政寬而廉諸山稱道官樣多以琴棋觴咏交
游縉紳閒時則堂寓河閒不遠千里往見得贈
詩云陋巷久無佳客過眼明忽見洞中賓要將
昔日黃梁夢說與人閒未悟人 少年初記識
君日老去相逢天盡頭徒步天涯見坡老世閒

能有幾元脩

巢元脩徒步萬里見東坡於海南國史列卓行傳

年五十

二預知死期別知識終於天慶方丈篋空無儲

惟古書百餘卷其徒囊骨歸葬家山金正韶字

九成號約山餘杭人早歲師桂林舒公敏慧淳

謹與石室同居讀書十餘年宋度宗召爲龍翔

宮書記今至元丙子後再以高士居宮之頤正

齋會

元教大宗師捧

詔入杭授洞觀沖素大師名山講師所居文籍山

積展翫耽讀至忘寢食雖病手不釋卷九深性
理之學庚寅秋解化畱書法眷云生死事急不
及候歸了無遲戀意年四十七學徒舒逢原集
其著述傳山中二公同志同出處皆不以壽終
何哉

贊曰上世才賢相望林野歲月寥邈有難稽
者後來有作纖悉模寫所憂泯滅遺恨泉下
二公苦學畱意風雅參以高道亦其次也

洞霄圖志卷第五

洞霄宮住持題名

本宮甲乙住持已前姓氏不可盡考矣從舊志
自宋紹興年閒至德祐乙亥凡十三人住持都
監兼領通明殿焚修皆係尙書省奏旨頒降敕
黃省劄差充歷任年月不暇詳錄

凝 妙 大 師 金 致 一

虛 靖 靈 一 大 師 葉 彥 球

右街道錄明素大師李 洞神

右街鑒義凝和大師陳 希聲

虛靖靈一大師葉彥球再充

葆光一大師潘三華

沖虛一大師高守中

虛一大師王居實

沖妙一大師龔大明

沖素一大師王大年

靈平一大師貝大欽

明一大師楊大中

演教一大師龔文煥

通 妙 大 師 郎 道 一

國朝至元十三年為始

住持

葆 真 毓 和 大 師 郎 道 一

至元戊寅十一月奉

管領道教所割付充住持都監壬午

三月欽奉

聖旨護持本宮自宋咸淳辛未四月由副職升住持

至今至元乙酉正

月終任凡十四年

凝 真 抱 素 大 師 貝 守 一

至元戊寅十一月奉

師割充住持

同都監至元庚辰九月終任凡二年

杭州路道教提點澄虛明教守正大師曹 至堅

至元己卯十月奉 師劄充副職兼

本路道教提點乙酉七月升提點住

持丁亥三月欽奉

聖旨護持本宮及諸宮觀己丑正月終任凡十年

養素沖元通妙法師吳 處仁

宋咸淳壬申四月充同知宮事今至

元戊寅十一月奉 師劄升知宮事

至元己丑八月升提點住持

當年十二月終任凡十八年

元貞元年爲始

住持兼管本山諸宮觀事

浙西道教提點體元崇教安道法師郎 如山

至元戊寅十一月奉 師剖充副宮
事己丑八月升提舉知宮浙西道道
教提點庚寅十一月升住持提點元
貞乙未正月欽奉

聖旨住持提點兼管本山諸宮觀事大德丁酉二月
欽受

宣命當年九月欽奉
聖旨賜金錦法服十一月終任凡十九年

浙西道道教提舉清脩明素冲道法師舒 元一

至元戊寅十一月奉 師剖充副宮
事己丑八月升浙西道道教提舉庚
寅十一月升提舉知宮元貞戊戌二
月欽奉

聖旨住持提舉知宮兼管本山諸宮觀事大德己亥
七月欽奉

宣命住持提點兼管本山諸宮觀事十二月敬奉
鎮遠王令旨奏賜通明養素真卿象簡金冠法服

甲辰六月以老包閑領都提點焚修
凡二十七年終於丁未六月

清修養素冲妙法師沈多福

至元庚寅十一月奉師剖充副知
宮事大德丁酉九月欽奉

聖旨佑聖觀提點戊戌八月升本宮提舉知宮己亥
七月欽奉

聖旨住持提舉兼管本山諸宮觀事庚子三月敬奉
晉王令旨冲天觀住持提點癸卯六月升本宮住
持提點兼管本山諸宮觀事甲辰六
月欽奉

聖旨護持及本山諸宮觀丙午二月又欽奉
聖旨護持當年六月欽受

宣命授清修養素冲妙法師杭州路天柱山大滌
洞天洞霄宮住持提點兼管本山諸
宮觀事

宮觀事

知宮事題名

宋紹興後

明真大師駱大成

沖和大師喻大時

沖真大師陳以明

宏教大師許可久

左街道錄凝真大師俞延禧

崇真大師登居仁

洞淵大師胡道樞

靈濟通真大師孫處道

凝神大師朱特立

國朝至元後

凝神大師朱特立

宋咸淳庚午正月充同知宮事壬申四月升知宮事今至元丁丑十一月

終任凡八年

崇道冲應清真大師觀妙齋高士周允和

至元戊寅十一月奉師蒞充知宮事太一宮觀妙齋高士至元乙酉七

月終任凡七年

同知宮事

宋紹興後

純素 大 師 登 師 德

凝和 大 師 章 居中

元素 大 師 王 思明

國朝至元後

真常洞微守正大 師 李 元 綱

至元庚寅十一月奉 師 劄 升 副 知 宮 事 大 德 己 亥 二 月 終 任 凡 九 年

通妙崇教冲逸法 師 孫 元 吉

軍校宗外制武去制

至天貞寅十一日奉

國傳至元貞常同知守五大福李 元際

國傳至元

天四紫

大 朝 章 中

大 朝 章 中

宋 徽 宗 影

同 侯 宮 車

杭州路道靖冲真洞元葆光法師楊 清一

大德丁酉九月欽奉

聖旨授杭州路道錄龍德通仙宮住持提點戊戌七月

欽受

宣命八月奉

師剖兼本宮知宮事己亥八月終

任凡

一年